



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno CCCXIV. ad annum CCCXLVI.

**Parisiis, 1644**

Septimvm. De his qui sacrificando varie errabant.

**urn:nbn:de:hbz:466:1-15072**

35. q. 2. & 3.  
Nullum in  
vstroque.  
Et in decr.  
Iuo. lib. 7.  
sub titulo  
Aurelia-  
nenfis Con-  
cilii, Can. 10

*Ex propinquitate sui sanguinis vel vxoris, vsque in septimum gradum, nullus ducat vxorem.*

Nullum in vtroque sexu permittimus ex propinquitate sui sanguinis vel vxoris, vsque in septimum generis gradum, vxorem ducere, vel incesti macula copulari. Præterea quoque illud adiecimus, quoniam sicut non licet cuiquam Christiano de sua consanguinitate, sic etiam nec licet de consanguinitate vxoris suæ coniugem ducere propter carnis vnitatem.

## SEXTVM.

De consec.  
distinct. 1.  
De fabri-  
ca vero.

*Ecclesia semel Deo consecrata quando est iterum consecranda.*

De fabrica vero cuiuslibet ecclesiæ, si diruta fuerit, instauranda, & si in eo loco consecrationis solennitas debeat iterari, in quo sanctuaria non fuerint, nihil iudicamus officere, si per eam minime iactetur aqua exorcizata, quia in consecratione cuiuslibet ecclesiæ, in qua Spiritus sancti arra non ponitur, celebritatem scimus tantum esse Missarum. Et ideo, si qua sanctorum basilica a fundamentis fuerit innouata sine altaris motione, sine aliqua dubitatione, cum in ea fuerit Missarum solennitas celebrata, totius consecratio sanctificationis implebitur. Si vero sanctuaria quæ habebant ablata sunt, rursus eorum depositione, & Missarum solennitate, reuerentiâ sanctificationis accipiat.

## SEPTIMVM.

*De his qui sacrificando varie errabant.*

De consec.  
distinct. 1.  
Cum om-  
ne. Et in  
decr. Iuo.  
lib. 1.

Cum omne crimen atque peccatum oblati Deo sacrificiis deleatur, quid de cetero pro expiatione delictorum Domino dabitur, quando in ipsa sacrificii oblatione erratur? Audiuius enim quosdam schismatica ambitione detentos, contra diuinos ordines & apostolicas institutiones lac pro vino in diuinis sacrificiis dedicare; alios quoque intinctam eucharistiam populis pro complemento communionis porrigere; quosdam etiam expressum vinum in sacramento Domini calicis offerre; alios vero pannum lineum musto intinctum per totum annum reseruare, & in tempore sacrificii partem eius aqua lauare, & sic offerre; quod quam sit euangelicæ & apostolicæ doctrinæ contrarium, & consuetudini ecclesiasticæ



aduersum, non difficile ab ipso fonte veritatis probatur, a quo ordinata ipsa sacramentorum mysteria processerunt. Cum enim Magister veritatis verum salutis nostræ sacrificium suis commendaret discipulis, \* nulli lac, sed panem tantum & calicem sub hoc sacramento cognoscimus dedisse. Legitur enim in euangelica veritate:

\* non illis

\* in sacrificio

*Accepit Iesus panem & calicem, & benedicens dedit discipulis suis.* Math. 26.

Cesset ergo lac \* sacrificando offerri, quia manifestum & euidens exemplum veritatis euangelicæ illuxit, quod præter panem & vinum aliud offerri non liceat. Illud vero, quod pro complemento communionis intinctam tradunt eucharistiam populis, nec hoc prolatum ex euangelio testimonium receperunt, ubi apostolis corpus suum commendauit & sanguinem. Seorsum enim panis, & seorsum calicis commendatio memoratur. Nam intinctum panem aliis Christum præbuisse non legimus, excepto illo tantum discipulo, quem intincta buccella Magistri proditorem ostenderet, non quæ sacramenti huius institutionem signaret. Nam quod de expresso botro, id est, de vuarum granis populis communicatur, valde est omnino confusum; sed, si necesse sit, botrus in calice comprimatur, & aqua misceatur: quia calix dominicus, iuxta Canonum præcepta, vino & aqua permixtus debet offerri, quia videmus populum in aqua intelligi, in vino vero ostendi sanguinem Christi. Ergo cum in calice vino aqua miscetur, Christo populus adunatur, & credentium plebs ei in quem credit copulatur & iungitur; quæ copulatio & coniunctio aquæ & vini sic miscetur in calice Domini, ut mixtio illa non possit separari. Nam si vinum tantum quis offerat, sanguis Christi incipit esse sine nobis; si vero aqua sit sola, plebs incipit esse sine Christo. Ergo quando botrus solus offertur, in quo vini \* efficacia tantum designatur, salutis nostræ sacramentum negligitur, quod aqua significatur. Non enim potest calix Domini esse aqua sola, aut vinum solum, nisi vtrumque misceatur. Et ideo, quia iam ex hoc plurima & multiplex maiorum manauit sententia, omnis deinceps talis error atque præsumptio cessare debet, ne peruersorum & inordinata compago statum veritatis eneruet. Et ideo nulli deinceps erit licitum aliud in

\* efficacia

*Concil. Tom. 2.*

Hhhh ij



sacrificiis diuinis offerre, nisi iuxta antiquorum sententiam Conciliorum, panem tantum & calicem vino & aqua permixtum. De cetero aliter quam præceptum est faciens, tamdiu a sacrificando cessabit, quamdiu legitima pœnitentiæ satisfactione correctus, ad gradus sui officium redeat quod amisit.

## OCTAVVM.

Ex decreto Iuonis Carnotensis desumptum.

*Quid sit ecclesia.*

Ecclesia Græcum nomen est quod in Latinum vertitur conuocatio, \* propter quod ad se omnes vocet. Catholica ( id est vniuersalis ) ideo dicitur, quia per vniuersum mundum est constituta. Vel quoniam catholica, hoc est generalis, in eadem doctrina est ad instructionem.

In decret.  
Iuo. lib. 1.

\* pro-  
pterea  
quod

## NONVM.

Ex eodem.

*De illis qui ecclesias incenderunt.*

Si quis ecclesiam comburit, quindecim annos pœniteat, & eam sedule restituat, & precium pauperibus distribuat.

In decret.  
Iuo. lib. 6.

## DECIMVM.

Ex eodem.

*Libertam domino legitime nubere posse.*

Si quis ancillam suam libertate donauerit, & in matrimonio sibi sociauerit, dubitabatur apud quosdam, vtrum huiusmodi nuptiæ legitimæ esse videantur, an non. Nos itaque vetustam ambiguitatem decidentem, talia connubia legitima esse censuimus. Si enim ex affectu fiunt omnes nuptiæ, & nihil impium & legibus contrarium in tali copulatione fieri potest, quare prædictas nuptias inhibendas existimaremus?

In decret.  
Iuo. lib. 6.